

四庫全書

史部

欽定四庫全書

史部

資治通鑑外紀卷二

詳校官修撰臣錢 蔡

刑部郎中臣許兆椿覆勘

總校官降調編修臣倉聖脉

校對官編修臣蔡廷衡

謄錄監生臣楊元吉

欽定四庫全書

史部二

資治通鑑外紀

編年類

提要

臣等謹案資治通鑑外紀十卷目錄五卷宋劉
恕撰恕字道原其先京兆萬年人祖受為臨川
令葬于高安因家焉宋史本傳稱其舉進士
入高等不著何年考司馬光作此書序稱恕
卒于元豐元年九月年四十七則當生于明

道元年又稱其登第時年十八則皇祐元年
進士也初授鉅鹿主簿遷知和川翁源二縣
會司馬光受詔修資治通鑑奏以恕同司編
纂轉著作郎熙寧四年以忤王安石乞終養
改秘書丞仍令就家續成前書遂終于家此
書乃其臨沒所成也蓋修資治通鑑時恕欲
與司馬光採宋一祖四宗實錄國史為後紀
而撫周威烈王以前事迹為前紀會遭憂遘

疾右肢痺廢知遠方不可得國書後紀必不能就乃口授其子義仲以成此書改名曰外紀凡包義以來紀一卷夏紀商紀共一卷周紀八卷又目錄五卷年經事緯上列朔閏天象下列外紀之卷數悉與司馬光通鑑目錄例同金履祥作通鑑前編頗詆其好奇今觀其書周成王元年丙戌稱周公攝王之元年越七年癸巳始稱成王元年則周公竟類新

莽之為又稱魯惠公為隱公娶于宋見其女
好而自納之生桓公是惠公先有衛宣之醜
如斯之類頗為不經又如齊桓觀龍殆如戲
劇熊渠射虎何預勸懲雖曰細大不捐亦未
免貪多務得履祥所論未可謂之吹求然外
紀于上古之事可信者大書其異同舛互以
及荒遠茫昧者或分註或細書未嘗不具有
別裁目錄于共和以後據史記年表編年共

和以前皆謂之疑年不標歲陽歲陰之名併
不縷列其數亦特為審慎且其自序稱陶潛
豫為祭文杜牧自撰墓誌夜臺甫邇歸心若
飛不能作前後紀而為外紀他日書成公為
前後紀則可刪削外紀之繁冗而為前紀以
備古今一家之言云云則恕作此書特初為
草稿儲材備用如通鑑之有長編以待司馬
光之刊定耳履祥不察當日書局編纂之例

遽加輕詆操之未免已蹙矣乾隆四十六年
十二月恭校上

總纂官

臣紀昀
臣陸錫熊
臣孫士毅

總校官

臣陸費墀

資治通鑑外紀序

道原好著書志欲籠絡宇宙而無所遺其著資治通鑑外紀十卷未以傳人病亟猶汲汲借人書以叅校已之書是正其失氣垂盡乃口授其子羲仲為書凡使撰外紀序皇祐初有詔士能講經義者聽別奏名其中所對最精詳先具疏次引先儒異說末以已意斷而論之凡二十問所對皆然主司驚異擢為第一及發糊名迺進士劉恕年十八矣先以是慕重之始與相識道原乃其

字也釋褐鉅鹿主簿遷和川令英宗雅好稽古詔光編次歷代君臣事仍謂光曰卿自擇館閣英才共修之光對曰館閣之士誠多至於專精史學臣未得而知所識者惟和川劉恕一人而已上曰甚善即奏召之共修書凡數年史事之紛錯難治者則以諉之光仰成而已今上即位賜名曰資治通鑑道原所編之事皆在通鑑之前故曰外紀焉光尋判西京留臺奏遷書局後數年道原至洛歸局中以元豐元年九月戊戌終官至祕書丞

年止四十七嗟乎以道原之耿介其不容於人齟齬以
沒固宜天何為復病而天之即此益使痛惋愴怛而不
能忘者也道原其先萬年人祖度為臨川令卒官葬高
安因家焉元豐元年十月日涑水司馬光君實序

資治通鑑外紀序

夫計億兆者始於一總衆異者歸於同古今兼載則竹帛不能紀撮其機會則事盡於終卷六經具而諸子興文籍煩而譜謀作太史公云黃帝以來皆有年數咸不同乖異歷漢魏晉去古益遠衆言不本於經夸者務爲詭誕包犧前後逮周厲王競列年紀更相違背遼邈無據安能考質存其一說備列于下與刪棄不取者莫知孰得孰失焉疑年茫昧借日名甲子以紀之共和以後

則用歲陽歲名而著於上示相別也班固謂三統歷最密杜元凱推春秋當時之歷見二百五十五年晦朔閏及日食而云三統歷術比諸家最疏推經傳朔日皆不諧合也京兆萬年劉恕撰

劉恕曰孔子作春秋筆削美刺子游子夏門人之高第不能措一辭魯太史左丘明以仲尼之言高遠難繼而為之作傳後之君子不敢紹續焉惟陸長源唐春秋尹洙五代春秋非聖人而作經猶春秋吳楚之君僭號稱

王誅絕之罪也左氏傳據魯史因諸侯國書繫年敘事
春秋所貶損大人當世君臣有威權勢力其事實皆形
於傳故隱其書而不宣以免時難後漢獻帝以班固漢
書文繁難省命荀悅依左傳體為漢紀言約事詳大行
於世晉太康初汲郡人發魏襄王冢得紀年文意大似
春秋其所記事多與左氏符同諸儒乃知古史記之正
法自是袁宏張璠孫盛于寶習鑿齒以下為編年之書
至唐五代其流不廢漢晉起居注梁唐實錄皆其遺制

也國語亦左丘明所著載內傳遺事或言論差殊而文詞富美為書別行自周穆王盡晉知伯趙襄子當貞定王時凡五百餘年雖事不連屬於史官益有補焉七國有戰國策晉孔衍作春秋後語並時分國其後絕不錄焉唐柳宗元采摭片言之失以為誣淫不槩於聖作非國語六十七篇其說雖存然不能為國語輕重也司馬遷始撰本紀年表八書世家列傳之目史臣相續謂之正史本朝去古益遠書益煩雜學者牽於屬文專尚西

漢書博覽者乃及史記東漢書而近代士頗知唐書自
三國至隋下逮五代懵然莫識承平日久人愈怠惰莊
子文簡而義明玄言虛誕而似理功省易習陋儒莫不
尚之史學寢微矣案歷代國史其流出於春秋劉歆敘
七畧王儉撰七志史記以下皆附春秋荀勗分四部史
記舊事入丙部阮孝緒七錄記傳錄紀史傳由是經與
史分夫今之所以知古後之所以知今因善惡以明褒
貶察政治以見興衰春秋之法也使孔子贊易而不作

春秋則後世以史書為記事瑣雜之語春秋列於六藝
愚者莫敢異說而終不能曉也恕皇祐初舉進士試於
禮部為司馬公門生侍於大儒得聞餘論嘉祐中公嘗
謂恕曰春秋之後迄今千餘年史記至五代史一千五
百卷諸生歷年莫能竟其篇第畢世不暇舉其大畧厭
煩趨易行將泯絕予欲託始於周威烈王命韓魏趙為
諸侯下訖五代因丘明編年之體倣荀悅簡要之文網
羅衆說成一家書恕曰司馬遷以良史之才敘黃帝至

秦漢興亡治亂班固已下世各名家李延壽總八朝為
南北史而言詞卑弱義例煩雜書無表志沿革不完梁
武帝通史唐姚康復統史世近亡軼不足稱也公欲以
文章論議成歷世大典高勲美德褒贊流於萬世元凶
宿姦貶絀甚於誅殛上可繼仲尼之經丘明之傳司馬
遷安可比擬荀悅何足道哉治平三年公以學士為英
宗皇帝侍講受詔修歷代君臣事迹恕蒙辟真史局嘗
請於公曰公之書不始於上古或堯舜何也公曰周平

王以來事包春秋孔子之經不可損益曰曷不始於獲麟之歲曰經不可續也恕乃知賢人著書尊避聖人也如是儒者可以法矣熙寧三年冬公出守京兆明年春移帥潁川固辭不行退居洛陽恕徧狷好議論不敢居京師請歸江東養親公以新書未成不廢刊削恕亦遙隸局中嘗思司馬遷史記始於黃帝而包犧神農闕漏不錄公為歷代書而不及周威烈王之前學者考古當閱小說取舍乖異莫知適從若魯隱之後止據左氏國

語史記諸子而增損不及春秋則無與於聖人之經包
攝至末命三晉為諸侯比於後事百無一二可為前紀
本朝一祖四宗一百八年可請實錄國史於朝廷為後
紀昔何承天樂資作春秋前後傳亦其比也將俟書成
請於公而為之熙寧九年恕罹家禍悲哀憤鬱遂中癰
痺右肢既廢凡欲執筆口授稚子羲仲書之常自念平
生事業無一成就史局十年俛仰竊祿因取諸書以國
語為本編通鑑前紀家貧書籍不具南徼僻陋士人家

不藏書卧病六百日無一人語及文史昏亂遺忘煩簡
不當遠方不可得國書絕意於後紀乃更前紀曰外紀
如國語稱春秋外傳之義也自周共和元年庚申至威
烈王二十二年丁丑四百三十八年見於外紀自威烈
王二十三年戊寅至周顯德六年己未一千三百六十
二年載於通鑑然後一千八百年之興廢大事坦然可
明昔李弘基用心過苦積年疾而藥石不繼盧昇之手
足孿廢著五悲而自沈賴水予病眼病創不寐不食才

名不逮二子而疾疹艱苦過之陶潛豫為祭文杜牧自
撰墓誌夜臺甫通歸心若飛聊敘不能作前後紀而為
外紀馬侗日書成公為前後紀則可刪削外紀之煩冗
而為前紀以備古今一家之言恕雖不及見亦平生之
志也

欽定四庫全書

資治通鑑外紀卷一

宋 劉 恕 編

包犧以來紀

包犧氏

包犧氏

蛇首人身
母曰華胥

風姓生於成紀

上古至周厲王無年
可紀而皇甫謐諸儒

所紀皆有年衆說差互不同及疑
事異端備列於注以示傳聞異辭

象日月之明謂之太

昊取犧牲以充包厨號包犧後世音謬謂之伏羲或謂

之處犧一號皇雄氏

或作黃熊

都陳

元年辛巳或云甲寅

上古之時人

民無別羣物不殊未有三綱六紀衣食器用之利民人

但知其母不知其父卧則呿呿起則吁吁饑則求食飽

即棄餘茹毛飲血而衣皮革伏犧德合上下天應以鳥

獸文章地應以河圖洛書則而象之仰觀象於天俯觀

法於地中觀萬物之宜造八卦始作三畫以象二十四

氣因而重之爻象備矣筮之紀陽氣之初以為律法建

五氣立五常定五行始名官而以龍紀有甲歷五運象

法乾坤以正君臣父子夫婦之義繼天而王為百王先
度時制宜作為罔罟以佃以漁以贍民用制嫁娶以儷
皮為禮於是人民乃治君親以尊臣子以順羣生和洽

各安其性

在位一百一十年或云一百一十六年至周
任宿須句顯史四國皆風姓司太昊有濟之

祀昔者天地未分謂之大易元氣始萌謂之太初氣形
始端謂之太始形變有質謂之太素質形已具謂之太
極亦曰渾沌五氣通運二靈體散為天地之元故離為
清濁清以陽發故氣冲為天濁以陰凝故質下為地天
地形別謂之二儀以
人參之謂之三才

開闢至獲麟二百七十六萬歲分為十紀大率一紀二
十七萬六千年或曰二十六萬七千年十紀者九頭

紀一也時有臣無
官位尊卑之別

五龍紀二也或云五姓紀二十七萬三千
六百年是為五龍一云七萬三千六百年

攝提紀三也或云七十二姓紀六百一十四萬九千五
百二十年是為攝提或云括提一云六十四萬九千五

百二十
五年

合洛紀四也或云三姓紀六千四
十年是為合洛一云六千三十年

連通紀五也或云六姓紀
三萬二千年是為連通

序命紀六也或云四姓紀四萬年是為序命亦云述紀
鄭玄六藝論曰遂皇之後歷六紀九十一代至伏羲始
作十二言之教方叔機注曰九頭紀一五龍紀五攝提
紀七十二合洛紀三連通紀六序命紀四凡九十一代

或云一百
八十七代

循飛紀七也
因提紀八也

禪通紀九也
流訖紀十也

或云訖訖

或以為十紀自燧人已下

一云伏羲前六紀後三
紀流訖紀自黃帝為始

天地渾沌如雞子盤古氏生其中萬八千歲天地開闢
陽清為天陰濁為地盤古在其中一日九變神於天聖
於地天日高一丈地日厚一丈盤古日長一丈如此萬
八千歲天數極高地數極厚盤古極長然則生物始於
盤古天地萬物之祖也其死也頭為五岳目為日月脂
膏為江海毛髮為草木先儒說盤古泣為江河氣為風
聲為雷目瞳為電喜為晴怒為陰秦漢間俗說盤古頭
為東岳腹為中岳左臂為南岳右臂為北岳足為西岳

吳楚間說盤古夫妻陰陽之始也後乃有三皇數起於一立於三成於五盛於七處於九故天去地九萬里天皇氏天地初立元氣肇始歲起攝提有神人一身十二頭號曰天靈或云一姓十二人頭即人也古語質如今人數魚鳥以頭計之被跡在西北柱州崑崙山下一作括州治一萬八千歲易緯通卦驗曰天皇之先與乾曜合元天地成位君臣適生君有五期輔有三名注云君之用事五行王亦有五期輔有三名公卿大夫也地皇氏代天皇一姓十一頭興於熊耳龍門山定星辰分晝夜以三十日為月十一月為冬至治一千年或云八千年或云一萬一千年

人皇氏代地皇九頭兄弟九人生於荆馬山出於堤地之口依山山川土地之勢財度為九州謂之九有各居其一而為之長人皇居中州以制八輔駕六羽乘雲車使風雨兄弟各三百歲或云各一百歲一百五十六代合

四萬五千六百年謂之九頭紀或云兄弟各一百六十代一云天皇地皇人皇兄弟九人分長天下

有巢氏上古穴處人民不勝禽獸蟲蛇有聖人教之構木為巢以避羣害食草木實號大巢氏治石樓山南有

天下百餘年或云百餘代

燧人氏民食果蓏蚌蛤腥臊臭惡傷害腹胃而多疾病有聖人作上觀星辰辰下察五木鑽木取火炮生為熟食人利性避臭去惡遂天之意有天下百餘代八萬年或云一萬二千年通卦驗曰遂皇始出握機矩表計真注云遂皇謂遂人在伏羲前始王天下矩法也言遂皇持斗機運轉之法指天以施政教六藝論曰易者陰陽之象天地之所變化政教之所生自人皇初起人皇即遂皇也諡周古史考曰有聖人以火德王號燧人次有三姓乃至伏羲皇甫謐帝王世紀曰燧人氏沒包犧氏代之自天皇至燧皇九十一代一百八萬二千七百六十

年

包犧氏沒女媧氏代立號女帝是為女皇元年辛未風
姓蛇身人首作笙簧張雲華而枝占神明往古之時四
極廢九州裂天不兼覆地不周載火燼炎而不滅水浩
洋而不息猛獸食精民驚鳥攖老弱於是女媧鍊五色
石以補蒼天斷鼉足以立四極殺黑龍以濟冀川積蘆
灰以止淫水天不足西北故日月移焉地不足東南故
百川注焉蒼天神四極正淫水涸冀川平狡蟲死
精民生承包犧制度無所革迨在位一百三十年

大庭氏

柏皇氏

中央氏

栗陸氏

驩連氏

赫胥氏

尊盧氏

混沌氏

皞英氏

有巢氏非人皇之後有巢氏

朱襄氏之治天下也多風而陽氣畜積萬物散解
果實不成士達作為五弦瑟以來陰氣以定羣生

葛天氏之樂三人拊牛尾投足以歌八闕一曰載民二
曰玄鳥三曰遂草木四曰奮五穀五曰敬天常六曰達

帝功七曰依地德

八曰總萬物之極

陰康氏

無懷氏自伏羲至無懷一千二百六十年或云五萬七
千七百八十二年女媧至無懷十五君襲包犧氏之號
一千一百五十年或云一萬七千七百八十七年一
云一萬六千八十年宋均曰女媧至神農七十二姓誰

周曰伏羲次有三姓始至女媧女媧後五十姓至神農

共工氏在包犧後任知刑以強伯九域而不王以水紀官雖有水德在火木之間非其序也周語曰昔共工虞子湛樂淫失其身欲壅防百川墜高堙庫以害天下皇天弗福庶民弗助禍亂並興共工用滅賈逵曰共工諸侯炎帝之後姜姓顓頊氏衰共工氏侵陵諸侯與高辛氏爭而王歸藏啟筮曰共工人面蛇身朱髮文子曰共工為水害故顓頊誅之淮南子曰昔共工之力觸不周之山使地東南傾與高辛爭而帝遂潛于淵宗族殘滅繼嗣絕祀又曰舜時共工振滔洪水以薄空桑荀卿子曰禹伐共工六韜曰共工氏自賢以為無可臣者久空大官天下日亂民無所附而亡韓詩外傳曰古封太山禪梁甫者萬餘人仲尼觀焉不能盡識管子治國曰昔者七十二家夷吾所識十二而已無懷氏乃至伏羲神

農列子楊朱曰伏羲已來三十餘萬歲莊子脰篋曰容
成氏大庭氏柏皇氏中央氏栗陸氏驪畜氏軒轅氏赫
胥氏尊盧氏祝融氏伏羲氏神農氏六韜大明曰柏皇
氏栗陸氏黎連氏軒轅氏共工氏宗盧氏祝融氏庸成
氏混沈氏吳英氏有巢氏朱襄氏葛天氏陰康氏無懷
氏金樓子興王曰容成氏大庭氏柏皇氏中央氏栗陸
氏黎連氏赫蘇氏宗盧氏祝和氏鵠冠子稱成鳩氏秦
丞相綰等曰古有天皇有地皇有泰皇泰皇最貴孔衍
春秋後語秦皇作人皇董仲舒春秋繁露曰推神農以
為九皇史記曰九皇氏沒六十四氏興六十四氏沒三
皇興張晏曰三皇之前有人皇九首堯昭曰上古有人
皇者九人即九皇也淮南子曰泰古二皇尚書中侯義
明曰洞五九禮闕郵注云闕止郵過言五帝後
洞三王之世其治各九百歲當以禮止過也
諸儒各稱上古名號年代世遠書亡其存者參差乖背
且復煩而無用今並畧之粗舉一二可以見古今衆說

誕妄
不同

神農氏

神農氏姜姓

人身牛首母曰任已有嬌氏
女名曰女登少典之正妃

長於姜水以

火承木故為炎帝

元年己巳或
云辛丑壬午

古者民茹草飲水采樹

木之實食羸蛇之肉多疾病毒傷之害神農以為人民

衆多禽獸難以久養乃求可食之物相土地燥濕肥境

高下因天之時分地之利教民播種五穀

周書曰神農
之時天雨粟

神農耕
而種之

作陶冶斤斧為耒耜鉏耨以墾草莽然後五穀

興以助果蔬實而食之又嘗百草酸鹹之味察水泉之
甘苦令民知所避就當此之時一日而遇七十毒神而
化之使民宜之天下號曰神農本起烈山稱烈山氏一

曰連山氏伊耆氏大庭氏魁隗氏

非包犧之後大庭氏
禮記明堂位曰土鼓

黃耆葦籥伊耆氏之樂也郊特牲曰伊耆氏始為蜡鄭
玄曰伊耆氏古天子有天下之號詩譜曰大庭軒轅達
於高辛皇侃曰神農伊耆一代總號其子孫為天子者
始為蜡祭熊安生曰伊耆氏即神農也案易神農始作
耒耜或云大庭神農之別號則
伊耆神農與大庭為一人也都魯以火紀官其俗樸

重端慤不忿爭而財足無制令而人從威厲而不殺法

省而不煩列鄺於國日中為市以聚貨帛國實民富而教化成削桐為琴繩絲為弦以通神明之德合天人之和諸侯夙沙氏叛不用命箕文諫而殺之神農暹而修德夙沙之民自攻其君而來歸其地南至交趾北至幽都東至暘谷西至三危莫不聽從

在位一百二十年或云一百四十年神農

納莽水氏女曰
聽談生臨魁

帝臨魁元年辛巳在位

六十年或云八十年

帝承元年辛巳在位六年或云六十年一本承在臨魁先

帝明元年丁亥
在位四十九年

帝直元年丙子
在位四十五年

帝釐一曰克元年辛酉
在位四十八年

帝哀元年巳酉
在位四十三年

帝榆罔元年壬辰在位五十五年自神農至榆罔四百
二十六年臨魁至榆罔七帝襲神農氏之號三百六年
春秋緯命歷序曰炎帝傳八世五百二十歲或云三百
八十年呂氏春秋曰神農有天下十七世諡周曰神農
至炎帝一百
三十三姓

黃帝

黃帝有熊國君少典之子姓公孫名軒轅

母曰附寶其先即炎帝母

家有嬌氏之女孕軒轅二十四月而生

晉語曰少典娶于有嬌氏生黃帝炎帝生於壽丘長於

姬水改姓姬神農氏世衰諸侯相侵伐暴虐百姓而弗能征軒轅習用干戈以征不享諸侯咸來賓從蚩尤最為暴莫能伐炎帝欲侵陵諸侯諸侯咸歸軒轅軒轅修德振兵治五氣藝五種撫萬民度四方教熊羆貔貅羆虎與炎帝戰於阪泉之野三戰然後得志蚩尤作亂不用命軒轅徵師與蚩尤戰于涿鹿之野蚩尤為大霧軍

士昏迷軒轅作指南車以示四方遂禽蚩尤戮於中冀

名其地曰絕轡之野

應邵曰蚩尤古天子鄭玄曰蚩尤伯天下尚書呂刑曰蚩尤惟始作

亂延及於平民孔安國曰九黎之君號曰蚩尤孔子三朝記曰蚩尤庶人之貪者韋昭曰九黎氏九人蚩尤之徒也周書嘗麥曰赤帝分正二卿命蚩尤臨四方司百工蚩尤乃逐帝于涿鹿之阿赤帝大懼說于黃帝執蚩尤殺之于中冀山海大荒北經曰蚩尤作兵伐黃帝帝命應龍攻于冀川之野應龍蓄水蚩尤請風伯雨師作大風雨黃帝下天女曰魃雨止遂殺蚩尤管子曰葛盧之山發而出金蚩尤以為劍鎗矛戟河圖曰蚩尤兄弟八十一人並獸身人語食沙石作兵杖刀戟大弩威振天下誅殺無道天授軒轅神符伏蚩尤主兵以制八方蚩尤沒後天下擾亂軒轅畫蚩尤形象以威海內衆謂蚩尤不死萬邦弭伏或云蚩尤兄弟七十二人食鐵石

軒轅誅之秦漢間說蚩尤氏耳鬚如劍戟
頭有角與軒轅闢以角觝人人不能向
諸侯咸尊軒

轅代神農氏為天子

元年丁亥或云巳丑辛丑丙子

是為黃帝黃者中

和美色帝始制法度萬世不易有土德之瑞故天下以

為號一曰軒轅氏

三統歷曰有軒冕之服天下號曰軒轅氏

有熊氏

皇甫謐曰新鄭

古有熊國黃帝之所都受國於有熊居軒轅之丘故因以為名又以為號帝鴻氏歸藏氏內

行刀鋸外用甲兵制陳法設五旗五麾天下不順者從

而征之東至于海西至于空桐南至于江北逐葷粥而

邑于涿鹿之阿遷徙無常處以師兵為營衛成命百物

以明民共財受地形象天文以雲紀官舉風后力牧太

山稽常先大鴻得六相而天地治神明至風后明乎天

道故為當時

風后或作蚩尤軒轅本紀曰黃帝舉風后為相力牧為將

太常察乎地

利故為稟者奢龍辨乎東方故為土師祝融辨乎南方

故為司徒大封辨乎西方故為司馬后土辨乎北方故

為李史官蒼頡造文字

崔瑗曹植蔡邕索靜曰蒼頡古之王者張揖曰蒼頡為帝王生

於禪通紀慎到曰在包犧前衛氏曰在包犧蒼帝之世
譙周曰在炎帝世徐整曰在神農黃帝之間或云蒼頡

作書天雨粟鬼夜哭帝受河圖見日月星辰之象始有星官之書

其師大撓探五行之情占斗剛所建始作甲子甲乙謂之幹子丑謂之枝枝幹相配以名日命容成造歷隸首作數伶倫自大夏之西阮隄之陰取竹於嶰谿之谷以生空竅厚鈞者斷兩節間長三寸九分而吹之以為黃鍾之宮制十二筩以聽鳳凰之鳴而別十二律其雄鳴為六雌鳴亦六以比黃鍾之宮生六律六呂候氣之應以立宮商之聲治陰陽之氣節四時之度推律歷之數起消息正閏餘作五聲以正五鍾五官以正人位又命

伶倫與榮獲鑄十二鍾以和五音以仲春之月乙卯之
日日在奎始奏之命曰咸池作冕垂旒充纁為衣玄裳
黃旁觀罩翟草木之華乃采五色為文章以表貴賤作
舟車以濟不通旁行天下方制萬里畫墍分州得百里
之國萬區以分星次經土設井以塞爭端立步制畝以
防不足使八家為井井開四道而分八宅鑿井於中一
則不洩地氣二則無費一家三則同風俗四則齊巧拙
五則通財貨六則存亡更守七則出入相司八則嫁娶

相媒九則無有相貸十則疾病相救是以情性可得而
親生產可得而均欺陵之路塞鬪訟之心弭井一為鄰
鄰三為朋朋三為里里五為邑邑十為都都十為師師
十為州分之於井而計於州則地著而數詳人民不夭
百官無私市不預賈城郭不閉邑無盜賊相讓以財風
雨時五穀登虎豹不妄噬鷙鳥不妄搏遠夷之國莫不
獻其貢職黃帝之子二十五宗其四母之子得姓者十
四十別為十二姓姬酉祁已滕箴任荀僖姁僂依二人

為姬二人為已正妃西陵之女曰嫫祖生二子一曰玄

囂是為青陽名摯

或云青陽女曰女節帝考德曰少囂曰清清者黃帝之子清陽也其子

孫名

二曰昌意居若水為諸侯娶蜀山氏女曰昌僕

謂

極女生顓頊於若水黃帝崩葬橋山

在位一百一年或云一百一十年或傳以為

仙或言壽
三百歲

少皞青陽居江水邑于窮桑天下號曰窮桑帝一曰帝
宣元年丁卯或云己巳乙丑以金德王號金天氏能修
太皞之法故曰少皞或云金天國號少皞身號以鳥紀
官都曲阜別為己姓之祖昌意子顓頊十年而佐少皞
十二而冠少皞在位八十四年崩年一百歲或云在位
百年葬雲陽命歷序曰少皞傳八世五百年或云十世

四百

顓頊二十登帝位元年辛卯或云癸卯癸巳都衛故為
帝丘後徙高陽稱高陽氏或云顓頊者專也頊者正也能
專正天人之道故稱之尚赤薦王以赤繒古者民神異
業少皞之衰九黎亂德民神雜糅不可方物夫人作享
家為巫史無有要質民匱于祀而不知其福蒸享無度
民神同位民瀆齊盟無有嚴威神狎民則不蠲其為嘉
生不降無物以享既災薦臻莫盡其氣顓頊受之乃命
南正重司天以屬神火正黎司地以屬民使復舊常無
相侵瀆顓頊作歷以孟春為元是時正月朔旦立春五
星會于天歷營室也冰凍始泮蟄蟲始發雞始三號天
曰作時地曰作昌人曰作樂鳥獸萬物莫不應和故顓
頊聖人為歷宗也北至幽陵南至交趾西至流沙東至
蟠木莫不砥屬顓頊之法婦人不辟男子於路者拂之
四達之衢飛龍作效八風之音命曰承雲以祭上帝令

鮮先為樂倡，鮮乃偃浸以其尾鼓其腹，其音英少。鮮孫
矯極之子曰營生，而神靈自言其名。年十五，佐顓頊在
位。七十八年崩，年九十八歲，或云九十一葬濮陽。命歷
序曰：顓頊傳九世三百五十年，或云八世五百四十八
年。

帝嚳三十登帝位，元年巳酉，或云辛亥。辛巳號高辛氏，
少皞之前，天下之號象其德。百官之號象其微。顓頊以
來，天下之號因其地、百官之號因其事。高陽、高辛皆所
興之地，名顓頊與嚳皆以字為號。上古質故也，或云高
辛非地名，德高而新也，或云顓頊帝嚳為帝之身，號高
陽、高辛皆國民土地之號，或云嚳者極也，言能窮極道
德。序三辰以固民都，毫尚黑薦玉以黑繒，命威黑為聲
歌。九招六列六英，倬作鼗鼓鐘磬，吹苓管塤篪，令鳳鳥
天翟舞之，以康帝德。帝嚳納四妃：元妃有邠氏女曰姜
嫄，生棄；次妃有娥氏女曰簡狄，生契；次妃陳絳氏女曰姜

慶都孕十四月生堯於丹陵次妃妣訾氏女曰常儀生
摯昔顓頊生稱稱生卷章卷章生重黎為訾火正淳耀
敦大天明地德光熙四海以生稟嘉材故命曰祝融共
土氏作亂讐使重黎誅之而不盡帝以庚寅日誅重黎
而以弟吳回為重黎後復居火正為祝融讐在位七十
五年崩或云六十年年一百或一百五歲九十八歲
九十二歲堊宜陽或云濮陽命歷序曰讐傳十世四百
年案左氏傳少皞氏有子曰重顓頊氏有子曰黎重黎
二人各出一帝而司馬遷並以重黎為楚國祖又以重
黎為官號而吳回為之故東晉譏遠并兩人而為一以重
無為有
謂此也

帝摯元年己未在位九年不善崩或云荒淫無法度不
修善政見廢摯少皞曾孫同名未詳自黃帝至帝摯三
百四十一年少皞至帝摯四君二百四十一年命歷序
曰黃帝傳十世一千五百二十年或云十八代尚書緯

曰孔子得黃帝
玄孫帝魁之書

帝堯

帝堯帝嚳之子年十五長十尺佐兄摯受封唐侯姓伊

祁

元年戊辰或云戊寅辛卯

號陶唐氏都平陽

鄭玄詩譜曰唐帝堯舊都之地今曰太原

晉陽堯始居此後遷河東平陽皇甫謐曰堯始封於唐今中山唐縣也後徙晉陽及為天子都平陽漢書音義曰唐今河東永安去晉四百里即冀也

尚白薦玉以白繒茅茨不翦櫟櫟

不斷素題不枿大路不畫越席不緣大羹不和粢食不

殺藜藿之羹飯於土簋飲於土釶金銀珠玉不飾錦繡

文綺不展奇怪物不視玩好之器不寶淫佚之樂不
聽宮垣室屋不聖色布衣撝形鹿裘御寒衣履不敝盡
不更為也不以私曲之故害耕稼之時吏忠正奉法者
尊其位廉貞平絜愛民者厚其祿民有孝慈力耕桑者
遣使表其閭正法度禁詐偽存養孤寡賑亡甦之家自
奉甚薄賦役甚寡巡狩行教周流五嶽西教沃民東至
黑齒存心於天下加志於窮民一民饑則曰我饑之也
一人寒則曰我寒之也一民有罪曰我陷之也百姓戴

之如日月親之如父母仁昭而義立德博而化廣故不
賞而民勸不罰而民治先恕而後教單均刑法以儀民
是時十日並出焦禾稼殺草木而民無所食猥狢鑿齒
九嬰大風封豨修蛇皆為民害堯乃使羿誅鑿齒於疇
華之野殺九嬰於凶水之上繳大風於青丘之澤上射
十日下殺猥狢斷修蛇於洞庭禽封豨於桑林萬民皆
喜天下廣狹險易遠近始有道里三苗復九黎之德堯
征而克之于丹水之浦以服南蠻育重黎之後不忘舊

者使復興之是為羲氏和氏至于夏商周重黎氏世敘
天地而別其分主於是龍門未開呂梁未發河出孟門
江淮通流四海溟滓無有平原高阜盡皆滅之名曰鴻
水民上丘陵赴樹木陰多滯伏而湛積水道壅塞不行
其原民氣鬱閼而滯著筋骨瑟縮而不達堯作為舞以
宣導之堯求能治水者羣臣四岳皆曰鯀可帝曰方命
圯族岳曰等之未有賢于鯀者願帝試之乃用鯀治水

顓頊五世孫

史記及帝王世紀顓頊生鯀三統歷顓頊五世生鯀杜預曰鯀則舜之五世從祖父

也而及舜共為堯臣堯則舜之三從
高祖而妻其女此史記之可疑也

堯封為崇伯鯀生

禹於石細長於西羌長九尺二寸

禹字高密母有莘氏
女曰志是為修己

堯娶散宜氏女曰女皇生朱不肖堯在位七十年求異

位四岳薦舜昔顓頊生窮蟬窮蟬生敬康敬康生句芒

句芒生蟠牛蟠牛生瞽叟瞽叟生舜於姚墟姓姚

字都
君母

曰握
登母死後母生象父母及象皆下愚不移瞽叟愛後

妻子常欲殺舜舜順事父母與弟日以篤謹出田則號

泣年五十猶嬰兒慕好學孝父寬裕溫良耕於歷山耆

年而田者爭處境墉以封壤肥饒相讓漁於雷澤漁者
爭處湍瀨以曲隈深潭相予陶於河濱河濱器不苦窳
作什器於壽丘就時於負夏一年所居成聚二年成邑
三年成都二十以孝聞三十堯聞其賢徵之草茅之中
與之語禮樂而不逆道廣大而不窮堯妻二女以觀其
內任之百官以觀其外封於虞為諸侯昔高陽氏有才
子八人天下謂之八凱高辛氏有才子八人天下謂之
八元世濟其美堯不能舉舜舉八凱主后土八元布五

教于四方三載考績堯知舜足授天下以為授舜則天下
下得其利而丹朱病授丹朱則天下病而丹朱得其利
堯曰終不以天下之病而利一人卒授舜使攝行天子
事舜受終于文祖鯀播其淫心稱遂共工之過治水九
年鄣洪水而不息功用不成舜巡狩四岳流共工放驩
兜竄三苗殛鯀四罪而天下咸服或云帝鴻氏少皞氏
顓頊氏緡雲氏皆有不才子曰渾敦窮奇檮杌饕餮堯
不能去舜投諸四裔以禦魑魅即四罪也帝乃舉禹使

續鯀之業鯀殛于羽山以死鯀作九仞之城或云禹作

城郭

呂氏春秋曰堯以天下讓舜鯀怒曰得天之道者為三公堯為失論欲得三公怒

甚猛獸欲為亂比獸之角能以為城舉其尾能以為旌召之不來彷徨於野以患帝舜於是殛之於羽山禹不敢怨而反事之官為司空以通水潦顏色黧黑步不相過竅氣不通以中帝心韓子曰堯欲傳天下於舜鯀諫曰不詳哉孰以天下而傳之匹夫堯不聽舉兵殺鯀於羽山之郊共工又諫堯又舉兵而誅之於幽都於是天下莫敢言無傳天下於舜仲尼曰堯知舜賢非其難也不以所疑敗其所察至乎誅諫者乃其難也

劉恕曰八凱八元堯之諸父昆弟四凶之罪著於海

內堯知舜於側微天下未盡厭服遺之大功二十使

民臣仰其功業而鄭玄以堯之末年四凶在朝為亢龍有悔焉足以知聖人哉

禹為人敏給克勤其德不違其仁可親其言可信聲為律身為度見耕者五耦而式過十室之邑則下為東德之士存焉與益稷命諸侯百姓興人徒以傳土行山表木定高山大川禹傷先人功之不成念前之非度釐改制量象物天地比類百則儀之于民而度之于羣生共工從孫四岳佐之禹勞身焦思居外十三年過家門不

敢入陸行載車水行載舟泥行蹈橈山行則梶身執耒
耒以為民先股無胈脛無毛手足胼胝支體偏枯高高
下下疏川導滯鍾水豐物封崇九山決汨九州陂鄣九
澤豐殖九藪汨越九原宅居九隩合通四海品處庶類
以為河所從來者高水湍悍難以行平地數為敗迺醜
二渠以引其河北載之高地至大陸播為九河淪濟漯
決江漢排淮泗而注之海鑿龍門闢伊闕析底柱破碣
石通九派疏五湖濬四瀆鴻水漏中州乾百川順流蛇

龍潛處各歸其所民得去高險處平土皆寧其性故天
無伏陰地無散陽水無沈氣火無災燁神無閒行民無
淫心時無逆數物無害生禹常稱人無食則不能使也
不利於人則不能勸也民勞而不怨苦者利歸於人也
人有無饘賣子者禹以歷山之金鑄幣贖之令益予衆
庶稻可種卑濕命稷予衆庶難得之食食少調有餘相
給以均諸侯禹乃行相地宜所有以貢及山川之便利
復舊制為九州行自冀州始制土田各因所生遠近賦

入貢棐楸遷有無萬國作人禹使大章步自東極至于
西垂二億三萬三千五百里七十一步又使豎亥步南
極盡於北垂二億三萬三千五百里七十五步四海之
內東西二萬八千里南北二萬六千里帝錫禹玄圭以
告成功天下於是平治稷帝譽子棄也為兒時忤如巨
人之志其遊戲好種樹麻菽麻菽美及為成人遂好耕
農地之宜穀者稼穡焉民皆法則之堯舉為農師民得
其利命夔效山林谿谷之音

變或作質

以歌以麋輅置岳而

鼓之拊石擊石以象上帝玉磬之音以致舞獸拌五弦
之瑟為十五弦命曰大章以祭上帝而天下大和堯有
子十人辟位二十八年凡在位百年而崩舜即天子位

謚法翼善傳聖曰堯周書謚法周公所作檀弓曰死謚
周道也而堯舜禹湯桀紂得有謚者因上世之生號追
之為死謚上世賢非至善至惡無號故他君無謚也白
虎通曰堯猶堯堯至高之貌清妙高遠優游博衍百王
之長也孔安國曰堯年十六升為天子七十載求禪試
舜三載自正月上日至崩二十八載堯凡壽百一十七
歲王肅曰歷試三載其一在徵用之年其餘二載與攝
位二十八年凡三十歲孔穎達曰堯一百一十六歲言
七誤也皇甫謐曰堯以甲申歲生甲辰即位甲午徵舜
甲寅舜代行天子事辛巳崩年百一十八在位九十八

年
葬穀林

鄭玄曰堯游成陽而死葬焉

帝舜

帝舜即位之明年正月元日格于文祖

元年戊申

本處虞之

塢汭天下號曰有虞氏都蒲坂

皇甫謐曰舜都或言蒲坂或言平陽或言潘潘

今上谷也

尚赤其社用土封堯子朱處丹淵為諸侯以奉先

祀服其服禮樂如之謂之虞賓天子弗臣示不敢專也

舜載天子旗往朝瞽叟夔夔惟謹如子道封弟象於有

庠為諸侯不得有為於其國天子使吏治其民而納其

貢稅故謂之放

韓子曰替喪為父而舜放之象為弟而舜殺之

舜廣開視聽求

賢人以自輔作五明扇立誹謗木恭已無為彈五弦之
琴歌南風之詩曰南風之薰兮可以解吾民之愠兮南
風之時兮可以阜吾民之財兮帥象禹之功度之于軌
儀莫非嘉績克厭帝心舜美禹能以德修繇之功以為
司空賜姓曰姒封為夏伯氏曰有夏謂之伯禹天下宗
之謂之大禹祚四嶽國命以侯伯賜姓曰姜氏曰有呂
謂其能為禹股肱心膂以養物豐民人封於申呂即伯

夷也禹曰非予能成亦大費為輔舜曰咨爾費贊禹功

其賜爾皐游爾後嗣將大出乃妻之姚姓之玉女

皇甫謐曰

賜之玄玉妻以姚姓之女

大費拜受佐舜能讓百物調馴鳥獸而知

其言是為栢翳舜賜姓嬴

鄭語曰嬴栢翳之後漢地理志曰秦之先伯翳助禹治水

為舜虞官養草木鳥獸賜姓嬴則栢翳伯翳乃一人聲轉故字異也列女傳曰皋子生五歲而佐禹曹大家注云皋子皋陶之子伯翳也中侯苗興曰皋陶之苗為秦史記音義曰大業是皋陶大費是伯翳一名栢翳業史記歷敘舜為名臣之後云栢翳之後為秦有本紀垂益變龍其後不知所封則秦之先栢翳非伯翳也尚書皋陶益同佐堯舜禹而諸家或云父子不可詳考先顓頊之裔孫曰女脩生子大

業大業取少典之子曰女華生大費大費生子二人一
曰大廉實爲谷氏二曰若木實費氏其子孫或在中國
或在夷狄舜以樂教天下重黎舉夔舜以爲樂正命延
益八弦爲二十三弦之瑟夔修九招六列六英以明帝
德於是正六律和五聲以通八風而天下大服重黎欲
益求人舜曰樂天地之精得失之節夔能和之以平天
下一而足矣棄及契益伯夷皆佐禹平水土有功舜以
棄爲后稷契爲司徒益作虞伯夷作秩宗皋陶作士垂

作共工夢典樂教胄子龍作納言四岳十二牧咸成厥
功唯禹之功為大四海之內咸戴舜之明德禹既興九
韶之樂致異物天下宗禹之明度數聲樂為山川神主
禹當朝廷嘗曰吾不恐四海之士留於道路恐其留吾
門也故士皆至舜以契能和合五教保于百姓封於商
賜姓子棄能播殖百穀疏以衣食民人封於邰賜姓姬
棄勤百穀而山死初舜娶堯二女曰娥皇女英女英生
商均亦不肖

帝王世紀曰舜長妃娥皇無子次妃女英生商均次妃癸比生二女雷明燭光

子九人在位三十三載命禹攝行天子事正月朔旦受命于神宗帥百官若帝之初於時俊乂百工相和而歌卿雲帝倡之曰卿雲爛兮紉縵縵兮日月光華旦復旦兮八伯稽首曰明明上天爛然星陳日月光華弘于一人帝乃再歌擁旋持衡枕首而笑曰時哉夫天下非一人之天下也亦見乎鐘石等瑟乃及鳥獸莫不闢情歸意焉日月有常星辰有行四時順經萬姓允誠於予論樂配天之靈遷于賢聖莫不咸聽襲乎鼓之軒乎舞之

精華已竭褰裳去之有苗氏在洞庭右彭蠡大山在其
南北因險而不服禹欲伐之舜不許曰吾德不厚而行
武非道也乃諭教焉三年有苗氏請服天下間之皆非

禹而歸舜之德

舜典云竄三苗于三危謂舜居攝之時
投竄之於西裔也又云庶績咸熙分北

三苗謂舜即位後三苗復不從化分北流徙之大禹謨
云帝曰惟時有苗弗率汝徂征謂禹攝位受命討之鄭
玄曰苗民即九黎之後顓頊誅九黎其子孫為三國高
辛之衰又復九黎之惡堯水禹攝位又三誅之穆王深
惡此族三生凶德故呂刑曰苗民弗用靈制以刑惟作
五虐之刑曰法又曰遏絕苗民無世在下又曰苗民無
辭于罰乃絕厥世吳起曰三苗氏在洞庭右彭蠡德義
不修禹滅之韋昭曰三苗炎帝之後諸侯也堯舜之時

誅討有罪廢絕其世不滅其國立其近親紹其先祀所以有苗國歷代常存屢不從化隨巢子汲冢紀年曰三苗將亡天雨血夏有冰地坼及泉青龍生於廟日夜出晝日不出三苗數叛數亡未知衆異出於何時禹

攝政十七年舜勤民事南巡狩崩於蒼梧之野禹即天子位

劉恕曰舜受堯顧託之重公天下而不私其親禹平水土拯民昏墊而舜在位五十載功德浹於衆心故舜巡狩南裔往而不返欲兆庶專意戴禹而遠邇無徯望之意也夫堯舜之德禹之大功自生民以來未

之有也

舜生三十徵庸三十在位

孔安國曰歷試二十年攝位二十八年

五十載陟

方乃死

謚法曰受禪成功曰舜仁聖威明曰舜白虎通曰舜猶儻儻也言能推信堯道而行之孔安國

曰舜三十徵庸三十在位服喪三年其一在三十之數為天子五十年凡壽百一十二歲案書稱帝乃殂落百姓如喪考妣三載四海遏密八音言百姓思慕堯德且明舜雖受終令天下服喪三年如繼世之禮故於殂落下終言之下文云月正元日舜格于文祖謂堯崩踰年見于文祖廟而改元孟軻不達此言以為三載服除後舜格于文祖乃妄稱孔子曰舜既為天子又帥天下諸侯以為堯三年喪是二天子矣若然當以服除之月至廟不當用正月元日也踰年改元春秋常法迄今如之柯又云堯舜禹崩三年喪畢舜禹益皆避其子然後踐

位且舜正月上日受終文祖已二十八年豈容至服除未定方讓其子孔安國仍軻之謬乃曰舜服堯喪三年畢將即政復至文祖廟周裒楊墨道咸孟子排而闢之可謂醇矣其於論經義談世事知謀往往短局乖戾陋儒愛其詞簡意淺雜然崇尚固可鄙笑也司馬遷云舜年三十堯舉之五十攝行天子事五十八堯崩六十一代堯踐帝位三十九年崩亦用孟軻舊說也鄭玄讀此經云舜生三十謂生三十年也微庸三十謂歷試三十年也在位五十載陟方乃死謂攝位至死為五十年舜年一百十歲也皇甫謐曰舜以堯之二十一年甲子生三十一年甲午微庸七十九年壬午即真百歲癸卯崩或云舜年一百五歲亦云一百一十三歲

江南九疑是為零陵有虞氏禘黃帝而祖顓頊郊堯而宗舜幕能帥顓頊者也故報焉

葬於

劉恕曰六經惟春秋及易象象繫辭文言說卦序卦
雜卦仲尼所作詩書仲尼刊定皆不稱三皇五帝三
王易下繫曰古者包犧氏之王天下也包犧氏沒神
農氏作神農氏沒黃帝堯舜氏作載繼世更王而無
三五之數或以包犧至舜是為五帝然孔子未嘗道
學者不可附會臆說也書之在孔子前存於今者無
幾漢藝文志周史六發六篇惠襄之間或曰顯王時
或曰孔子問焉顏師古曰即今之六韜也今六韜周

文王武王問太公兵戰之事其言鄙俚煩雜不類太公之語蓋後人依託而為之按志兵書五十三家自吳齊孫子已下而無六弋又在儒家非兵書也顏說之妄孔穎達云六韜後人所作好事者妄云太公非實事也班固曰禮經三百威儀三千及周之衰諸侯將踰法度惡其害已皆滅去其籍自孔子時而不具至秦大壞馬融云秦孝公已下用商君之法其政酷烈與周官相反故始皇禁挾書特疾惡欲絕滅之搜

求焚燒獨悉漢武帝開獻書之路周禮出於山巖屋
壁復入秘府諸儒莫得見焉孝成時劉歆校秘書始
得列序著于錄畧為衆排棄林碩以為末世瀆亂不
驗之言作十論七難以詆之何休亦謂六國陰謀之
書据秦火之餘周禮最後出儒者附益固非完本周
三百六十官今乃有三百六十職冗瑣淺陋可明其
偽妄劉歆不當謂之周公致太平書而目為六國陰
謀過矣管子亦在孔子前稱明一者皇察道者帝通

德者王謀得兵勝者霸又稱五帝三王傳子云管仲
之書過半便是後之好事所加乃說管仲死後事其
輕重篇尤復鄙俗孔穎達曰世有管子書或是後人
所錄故知六韜稱三皇周禮稱三皇五帝及管子書
皆雜孔子後人之語校其歲月非本書也先秦之書
存於今者周書老子曾子董子慎子鄧析子尹文子
孫子吳子尉繚子皆不言三皇五帝三王論語墨子
稱三代左氏傳國語商子孟子司馬法韓非子燕丹

子稱三王穀梁傳荀卿子鬼谷子元倉子稱五帝元
倉子又稱明皇聖帝孔穎達云穀梁傳漢初始作不
見經文故多妄言陸德明云穀梁赤乃後代傳聞案
漢隋唐書無元倉子新唐書藝文志云天寶元年詔
號元桑子為洞靈真經求之不獲襄陽處士王士元
謂莊子作庚桑子太史公列子作元倉子其實一也
取諸子文義類者補其亡封演云王巨源採莊子庚
桑楚篇義補葺分為九篇云其先人於山中得古本

奏上之敕付學士詳議疑不實竟不施行今元桑子
三卷是也惟文子列子莊子呂氏春秋五經緯始稱
三皇鵽冠子稱九皇案文子稱墨子而列子稱魏文
侯墨子稱吳起皆周安王時人去孔子沒百年矣藝
文志鵽冠子一篇楚人居深山以鵽為冠唐世嘗辨
此書後出非古鵽冠子今書三卷十五篇稱劇辛似
與呂不韋皆秦始皇時人其文淺意陋非七國時書
藝文志云文子老子弟子孔子並時非也莊子又在

列子後與史列皆寓言誕妄不可為據秦漢學者宗其文詞富美論議辯博故競稱三皇五帝而不究古無其人仲尼未嘗道也漢夏侯勝眭孟之徒以道術立名其所述著無識一言劉向父子校定九流亦無識錄故知識緯起於哀平間假託鬼神妄稱祥瑞王莽好符命光武以圖識興俗儒趨時其學遂盛乃云孔子既敘六經恐後世不能稽同其意別立緯識而春秋元命包稱公輸班墨翟又言益州紫班翟在仲

尼之後漢武帝始置益州春秋識云堯使共工理水
詩識云蚩尤敗然後堯受命前後顛倒咸與經傳不
合故名儒以為祆妄亂中庸之典司馬遷孔安國皆
仕漢武帝遷據穀梁傳荀卿子等稱五帝不敢信文
列莊子呂氏春稱三皇見百家言黃帝左氏傳傳言
高陽高辛氏書始堯舜而當時大儒董仲舒亦云推
神農為九皇改號軒轅謂之黃帝因存帝顓頊帝嚳
帝堯帝舜為五帝遷故作五帝本紀孔安國為博士

考正古文獨見周禮據外史掌三皇五帝之書左傳云左史倚相能讀三墳五典八索九丘史克曰少皞氏有不才子郯子曰我高祖少皞摯之立也安國以周禮為古文而不知周禮經周末秦漢增損偽妄尤多故尚書序云伏犧神農黃帝之書謂之三墳少昊顓頊高辛唐虞之書謂之五典孔穎達云三墳之書在五典之上數與三皇相當墳又大名與皇義相類故云三皇之書堯舜典是二帝之典推此而上則五

帝當五典三墳五典已經芟夷存者二典而已書緯云帝嚳以上朴畧難傳唐虞以來煥炳可法禪讓之首至周五代此皆無所稽據穿鑿妄說耳史克又云緡雲氏郟子又云共工氏豈皆帝乎論者以世本帝繫大戴禮五帝德家語宰我問與史記本紀同以黃帝為五帝則三皇乃少一人故甄耀度以燧人白虎通以祝融或以共工同犧農為三皇鄭玄注中侯救省圖引運斗樞以伏羲女媧神農為三皇軒轅少昊

高陽高辛陶唐有虞六代為五帝德合北辰得天皇
之氣者皆稱皇協五帝座星者皆稱帝故三皇三而
五帝六也梁武帝以伏羲神農燧人為三皇黃帝少
皞顓頊帝嚳帝堯為五帝而曰舜非三王亦非五帝
與三王為四代而已鄭及諸儒自相譏病其指不通
世本經秦歷漢儒者改易大戴禮出於世本家語王
肅私定以難鄭玄故有冉有問孔子三皇五帝不用
五刑案孔子時未有語三皇五帝言者皆周末秦已

後偽書耳馬昭云家語王肅增加非鄭玄所見孔穎達云王肅欲家語與經傳符同故彊為之辭冀合其說所言雖同司馬遷而不足為遷之助賈逵云三墳三皇之書五典五帝之典延篤言張平子說三墳三禮禮為人防爾雅曰墳大防也書曰誰能典朕三禮天地人之禮也五典五帝之常道也馬融云三墳三氣陰陽始生天地人之氣也五典五行也杜預云皆古書名漢晉羣儒論三墳五典亦與孔說不同惟鄭

玄注周禮外史三皇五帝之書云楚靈王所謂三墳
五典此說出於孔安國非其新意賈公彥云孔鄭之
說無正文故延叔堅馬季長所解有異也或說董仲
舒對程雅曰三皇三才也五帝五常也三王三明也
五伯五嶽也其說全無意義非仲舒之言也或曰左
氏傳禮記祭法有少昊顓頊帝嚳名號豈可據繫辭
皆去之以堯舜次黃帝無乃太畧乎答曰儒學論議
當本於經顧彪謂正可依經詰大典不可用傳記小

說此言得之先儒云女媧至無懷氏十五帝臨魁至
榆罔七帝承襲犧農而王然則少昊已後亦嗣黃帝
如無懷臨魁比也至堯功德特高別為一代又自古
以來皆傳其子或以干戈逆取而堯及舜皆有子擇
賢而授不私其親上古以來二人而已故可上紹黃
帝而繼犧農藝文志云孝文時得魏文侯樂人竇公
獻其書乃周官大宗伯之大司樂章也桓譚新論云
竇公年年百八十歲武帝時河間獻王好儒與毛生

等共采周官及諸子言樂事者取公孫尼子以作樂
記大司樂舞雲門以祀天神咸池以祭地示大磬以
祀四望通夏殷周為六樂樂記曰武王封黃帝堯舜
夏殷之後為三恪二王後黃帝而及堯舜不數少皞
顓頊帝嚳實公所傳在秦焚書之前獻王采錄古書
可以取信然大司樂有雲門大卷大咸而樂記有大
章咸池已差異矣包犧神農世遠樂名不見少皞顓
頊帝嚳承黃帝之後不特為一代故無樂名孝經鉤

命決云伏犧樂曰立基神農曰下謀祝融曰屬續帝
系譜云伏犧樂曰扶來神農曰扶持帝王世記云少
皞樂曰九淵樂緯云顓頊樂曰五莖帝謦曰六英漢
禮樂志云顓頊作六莖帝謦作五英皆緯書帝系譜
漢志世紀放六樂撰其名故多差異非本稱也秦初
并六國丞相等議帝號曰古有天皇有地皇有秦皇
秦皇最貴臣等上尊號王為秦皇王曰去泰著皇米
上古帝位號號曰皇帝乃知秦以前諸儒或言五帝

猶不及三皇後代不考始皇本紀乃曰兼三皇五帝
號曰皇帝誤也西漢之末去聖益遠孔安國尚書傳
雖未立于學官而儒者惑于安國司馬遷二家殊異
又怪易繫大司樂樂記堯舜上繼黃帝帝雖劉歆博
物洽聞疑而未了故三統歷本易始於包犧至少皞
顓頊帝嚳乃曰周舉其樂故易不載而不明言舉樂
及不載之義鄭玄注易繫辭云金天高陽高辛遵黃
帝之道無所改作故不述焉崔靈恩曰舞樂之始興

于黃帝其德宜法遠存其後敬之為恪顓頊高陽二代之君雖復為樂進非始舞之制又非宜今之用故越之而用雲門不立其樂亦不為恪也熊安生解禮周以黃帝堯舜之後為三恪但云取其制作之人孔穎達謂易畧舉五帝之始終則少皞顓頊帝嚳在其間也歷世紛紛莫知定論皆泥于舊文肆為解釋不可強通易云作八卦為罔罟取諸離包犧氏也為耜耒取諸益日中為市取諸噬嗑神農氏也垂衣裳取

諸乾坤為舟楫取諸渙服牛乘馬取諸隨重門擊柝
取諸豫為杵臼取諸小過弧矢取諸睽黃帝堯舜也
至于宮室取大壯棺槨取大過結繩而治易之以書
契取諸夬蓋世遠難明傳聞殊異仲尼于疑事則闕
而不強為之辭六事則總言黃帝堯舜三事但曰後
世聖人而孔安國尚書序乃曰伏犧氏造書契以代
結繩之政指言伏犧與繫辭文意相反按家語篇後
及史記孔子世家云安國至臨淮太守蚤卒連業子

有孔臧報從弟侍中書言以隸篆定尚書五十餘篇
並為之傳即安國也安國于經義不詳故書傳多差
謬馬鄭王肅諸儒悉解今文尚書晉宋後始行古學
獨有孔傳因而傳之其學非能優于諸家也

資治通鑑外紀卷一